



mjesečni Bilten

omladinska mreža bosne i hercegovine

juli
srpanj
2016.

206

Dragi prijatelji/ce,

Predstavljamo vam julsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **181** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u julu 2016.....	2
Planovi za avgust 2016.	4
Aktivnosti članova mreže	5
Saopštenja/informacije/donatori/pozivi.....	20

Uživajte u čitanju!

AKTIVNOSTI ORC/HCA U JULU 2016.

Tokom jula zaposleni i članovi Omladinskog resursnog centra Tuzla iskoristili su ljetno zatišje kako bi otišli na zaslužene godišnje odmone, te prikupili snage i energiju za nastavak svih naših aktivnosti. Zbog toga je i kancelarija ORC-a bila zatvorena i nismo imali aktivnosti. Ali, to ne znači da naši omladinci nisu bili vrijedni u ovom mjesecu:

Omladinska grupa ORC Tuzla

AKCIJA DOBROVOLJNOG DARIVANJA KRVI

U srijedu, 27.07. 2016. godine održana je akcija dobrovoljnog darivanja krvi koja je bila namijenjena svim građanima grada Tuzle. Akcija je organizovana od strane **Crvenog krsta općine Tuzla** na Klinici za transfuziologiju Univerzitetsko kliničkog centra Tuzla.

Statistički podaci pokazuju da je u ljetnim mjesecima najmanji broj dobrovoljnih darivalaca krvi, time i najoskudnije zalihe ove neprocjenjive tečnosti, a ujedno i najveće potrebe za krvlju (zbog čestih saobraćajnih nesreća). Iz tog razloga Crveni križ grada Tuzla došao je na ideju da okupi različita udruženja mladih ljudi kao i sportske klubove kako bi organizovali uspješnu akciju dobrovoljnog darivanja krvi upravo u mjesecu julu , te na taj način poslali snažnu poruku našoj zajednici i dokazali snagu mladih ljudi grada Tuzle. Učešće u ovoj akciji uzeli su i članovi Omladinske grupe Omladinskog Resursnog centra *Emina Muranović, Admir Isanović i Mirela Husičić.*



ZAŠTO TUZLANSKI STEĆCI NISU NA LISTI UNESCO-A?!

Mjesec juli 2016. godine će ostati upisan zlatnim slovima kada je u pitanju kulturno-historijsko nasljeđe Bosne i Hercegovine. Na sjednici UNESCO-a u Istanbulu su stećci kao srednjovjekovni nadgrobnji **spomenici bosanskih bogumila, katolika, i pravoslavaca**, uvršteni na listu Svjetske kulturne baštine pod zaštitom UNESCO-a. Na toj sjednici je na prijedlog ICOMOS-a Bosna i Hercegovina povukla dva lokaliteta odnosno nekropole stećaka kod Tuzle i Pala. Oni su povučeni sa liste jer su zapušteni, neobilježeni, i u izuzetno lošem stanju.

Grupa mladih aktivista iz Tuzle: *Slobodan Blagovčanin, Adi Selman, Adnan Čirak, Nedim Musić, i Lejla Suljić* odlučili su posjetiti nekropolu stećaka kod Tuzle, i lično se uvjeriti zašto je UNESCO baš tu nekropolu izbacio sa liste.



Svoju akciju su snimali putem video priloga, kako bi na taj način široj društvenoj zajednici uputili apel na stanje u kojem se nalaze tuzlanski stećci. Akcija je dobila odličnu povratnu reakciju u javnosti i video su objavili svi vodeći mediji sa prostora Tuzlanskog kantona.

PREDSTAVLJAMO MLADE!

Jasmina Đugić



Đugić Jasmina ima 25 godina, rođena je i živi u Tuzli. Završila je Ekonomski fakultet u Tuzli i trenutno odrađuje i pripravnički staž. Prva iskustva sa volontiranjem stiče u srednjoj školi kao član Odbora Omladinske banke Tuzla.

Nakon toga, volontirala je i na nekim manjim projektima i festivalima umjetnosti. Nakon angažmana na projektu Youth Event-a Tuzla 2015, zbog dobre saradnje i posvećenosti članova, volontera i organizatora, postaje članicom Omladinske grupe ORC-a.

Mehmed Sulejmanagić



Mehmed je završio Elektrotehničku školu u Tuzli 2015. godine, a trenutno studira Poslovnu informatiku na Visokoj školi „eMPIRICA“. Volontiranje i aktivnost u NGO je započeo 2012. godine, što ga je dovelo do Omladinske grupe Omladinskog Resursnog Centra u Tuzli, koja mu je omogućila da iskaže svoju sposobnost i kreativnost na mnogim područjima aktivizma kao i mnogobrojnih događaja i dešavanja. Svoje rijetko stečeno slobodno vrijeme provodi u usavršavanju svojih sposobnosti na području grafičkog dizajna, te se bavi muzikom i pecanjem.



NAJAVA AKTIVNOSTI OMLADINSKE GRUPE ORC ZA AVGUST

„NEDOVOLJAN 1“

Projekat **"Nedovoljan 1"** OGORC će implementirati u kući plamena mira u Tuzli, početkom mjeseca septembra. Cilj projekta je edukacija srednjoškolaca i mladih o prevenciji maloljetničke delinkvencije, gdje će se i između ostalog obrađivati teme poput: stereotipi i predrasude, delinkvencija i nenasilna komunikacija, volonterizam i slično. Direktni učesnici našega projekta su srednjoškolci i mladi. Projektom je planirano da će 90 učesnika proći naše module radionica, a roditelji, kao indirektni korisnici imaju priliku postavljati pitanja na našem online savjetovalištu. Ovaj projekat će koristiti prije svega onima koji učestvuju na ovom projektu, lokalnoj zajednici i naravno nama kao mladima koji ćemo raditi sa svojim vršnjacima. Projekat je podržan od strane Instituta za razvoj mladih KULT. Projektni koordinator je *Husein Šljivić*.

„DARE TO STAY“

„Dare To Stay“ naziv je projekta čija je glavna tema nezaposlenost mladih, a koji će se baviti i pripremom mladih na ulazak na veoma surovo tržište rada. Cilj je osposobiti i olakšati prvo zaposlenje mladih u našoj zajednici.

Realizacija projekta „Dare To Stay“ će započeti edukativnom radionicom koja će biti održana u Kući Plamena Mira, a obuhvatati će sljedeće teme: timski rad, pisanje CV-a i motivacionog pisma, pripreme za intervju sa poslodavcem, komunikacija i motivacija. Planirani broj učesnika je 30. Pored toga, u sklopu projekta održat će se okrugli sto i javna tribina na kojima će se raspravljati o mogućnostima i perspektivama zapošljavanja mladih.

Ovaj projekat je odobren i finansiran od strane **Helsinki Citizens' Assembly Istanbul**, Turska, u okviru partnerskog projekta **„Prekogranične građanske mreže za mir, pomirenje i sigurnost ljudi na Balkanu“**, a koordinator projekta je *Jasmina Begović*. Prve aktivnosti planirane se krajem avgusta.

REDOVNE AKTIVNOSTI ORC I HCA TUZLA

Tokom jula radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

PLANOVI HCA/ORC-A ZA AVGUST 2016.

- Sprovođenje redovnih aktivnosti kroz Omladinsku mrežu Bosne i Hercegovine;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Nastavak rada na namicanju sredstava za 2016. godinu.

AKTIVNOSTI ČLANICA OMLADINSKE MREŽE BiH



Omladinsko udruženje Nova vizija

Ul. Opara bb, 72290 Novi Travnik

Tel./fax: +387 61 309 687, +387 61 593 773

E-mail: ounovavizija@gmail.com

Facebook: <https://www.facebook.com/ounovavizija>

Omladinski centar Novi Travnik ispisuje pozitivnu priču u Novom Travniku



U julu 2015. godine Nova vizija preuzela je upravljanje **Omladinskim centrom u Novom Travniku**. Tada je ugovor sa općinom Novi Travnik potpisan na godinu dana uz dogovor da **Nova vizija** rukovodi centrom te razvija programe rada. Ubrzo se pristupilo projektu renoviranja prostorija i opremanja istih namještajem što je mladima ponudilo nove mogućnosti za aktivizam. Zahvaljujući naporima volontera/ki Nove vizije ubrzo je centar dobio svoj novi sjaj i postao prepoznatljivo mjesto za različite aktivnosti. Nova vizija i općina Novi Travnik nastavili su pozitivnu priču i u toku 2016. godine. Zahvaljujući prvenstveno velikom naporu volontera/ki Nove vizije i želji da mladi imaju sigurno mjesto za svoje aktivnosti nastavlja se uspješan trend rada Omladinskog centra.

Od vremena preuzimanja koordinacione uloge u Omladinskom centru do početka jula 2016. godine u prostorijama centra je realizovano ukupno 908 sati različitih programa i aktivnosti. Edukativne radionice, treninzi, probe, sastanci i volonterske akcije nekoliko organizacija, neformalnih grupa mladih ispisuju jednu novu etapu rada Omladinskog centra.

Omladinski centar kroz programe Nove vizije postao je i mjesto zdravog i sigurnog okruženja s obzirom da je u OC strogo zabranjeno konzumiranje alkohola, cigareta i drugih štetnosti te se kroz rad centra promoviše tolerancija, radi na prevenciji nasilja i kreira ambijent sigurnog okruženja za mlade u ovom gradu.



Institut za razvoj mladih KULT

Ul. 4. Viteške brigade 34-36 BA, 71210 Ilidža, Sarajevo
E-mail: kult@mladi.org
Tel.: +387 33 778 778; Fax: +387 33 778 779
Web: www.mladi.org

Predstavници iz BiH među 150 učesnika konferencije „Western Balkans Youth Conference“ u Parizu

Predstavnici Instituta za razvoj mladih KULT učestvovali su na konferenciji „Western Balkans Youth Conference“ koja je održana 04. jula 2016. godine u Parizu.

Konferencija je okupila oko 150 mladih iz zemalja Zapadnog Balkana i Evropske unije koji su razgovarali o izazovima sa kojima se susreću mladi danas, te pokušali iznaći načine njihovog prevazilaženja. Ovo okupljanje bilo je prilika da mladi probleme sa kojima se susreću predstave državnim ministrima iz resora za pitanja mladih, te ukažu na neophodnost njihovog rješavanja.

Mladi su tokom svojih obraćanja istakli da postojeći evropski programi razmjene moraju biti snažnije promovisani, da regionalna saradnja mora biti jača, da trebaju biti razvijeni okviri za jednostavnije prepoznavanje kvalifikacija među zemljama, te da je neophodno ojačati vezu između formalnog i neformalnog obrazovanja.

Jedan od zaključaka bio je i da jaz između obrazovanja, vještina i potreba radnog mjesta mora biti prevaziđen kroz veću podršku obaveznom stažiranju i praksi tokom obrazovanja, a da novi biznisi mladih trebaju biti više pomognuti pristupom finansijama, odnosno startnom kapitalu, te da poduzetništvo mora imati intenzivniju promociju među mladima kao karijerni izbor.

Mladima se tokom konferencije, između ostalih, obratio i ministar civilnih poslova Bosne i Hercegovine *Adil Osmanović*.

Ajka Baručić, predstavnica Instituta za razvoj mladih KULT i jedna od predstavnica iz Bosne i Hercegovine, istakla je kako je jasno da mladi Zapadnog Balkana dijele vrlo slične probleme u ostvarivanju dostojanstvenog ekonomskog i društvenog statusa, ali da isto tako zajedničkim promišljanjem i dijalogom itekako mogu iznjedrili kvalitetne preporuke i prijedloge za jasnu viziju naprijed, što je konferencija i pokazala. Kako je naglasila, mladima iz Bosne i Hercegovine važno je da se snažnije povezuju sa regijom, kako se ne bi osjećali usamljeno u prevazilaženju izazova vezanih za pitanja mladih i kako bi se okoristili mudrostima, dobrim praksama i iskustvima susjednih, ali i ostalih evropskih zemalja.

Na konferenciji je predstavljen i koncept rada **Regionalne kancelarije za saradnju mladih (Regional Youth Cooperation Office – RYCO)**, koja je zvanično formirana na Samitu lidera Zapadnog Balkana, a u okviru kojeg je održana i konferencija „Western Balkans Youth Conference“. Regionalnu kancelariju za saradnju mladih formirat će vlade šest zemalja regiona – Bosne i Hercegovine, Srbije, Crne Gore, Kosova, Makedonije i Albanije, zajedno sa predstavnicima civilnog sektora.





„Ova kancelarija bi trebala u budućem periodu doprinijeti pomirenju mladih u ovoj regiji, budući da su mnoge aktivnosti koje su se do sada dešavale u ovoj oblasti bile inicijative nevladinog sektora. Sada po prvi put imamo inicijativu zemalja regije da nešto žele zajednički formirati“, istakao je *Rejan Igor Roić* iz Komisije za koordinaciju pitanja mladih Bosne i Hercegovine.

Konferenciju je zaključila *Genoveva Ruiz Calavera*, direktorica za Zapadni Balkan pri Direktoratu Evropske komisije za susjedstvo i pregovore o proširenju, naglasivši da je budućnost Evrope u sigurnim rukama, jer su mladi tokom konferencije pokazali da znaju šta je potrebno poduzeti u rješavanju prisutnih problema.

Konferencija je organizovana od strane **Evropske komisije** i **Vlade Republike Francuske**, uz podršku **Evropskog foruma mladih** (European Youth Forum) i **SALTO resursnog centra Jugoistočne Evrope** (South East Europe Resource Centre). ■

Podrška za dvanaest lokalnih inicijativa

Institut za razvoj mladih KULT podržao je realizaciju lokalnih građanskih inicijativa u dvanaest lokalnih zajednica u Bosni i Hercegovini.

U prostorijama Instituta 19. jula 2016. godine potpisani su ugovori o dodjeli sredstava sa organizacijama koje će provesti aktivnosti na izgradnji i obnovi igrališta, uređenja parkova, te organizovanja kulturnih i sportskih sadržaja u lokalnim zajednicama, a sve s ciljem da se mladi ljudi dodatno aktiviraju u lokalnim zajednicama i tako se uvjere u svoje mogućnosti uključivanja u društvena događanja.

Ugovori su potpisani sa udruženjima „**Bosansko selo**“ iz Srebrenika, „**Vijeće mladih općine Stari Grad**“ iz Sarajeva, „**Omladinski Resursni Centar**“ iz Tuzle, „**INPUT**“ iz Zenice, „**Mladi volonteri**“ iz Visokog, „**OKPIS**“ iz Jablanice, „**EKO MLADI**“ iz Busovače, „**MB Live**“ Doboju Istok, „**Mladi aktivisti**“ iz Kneževa, „**Vijeće mladih grada Mostara**“, „**Green Council**“ iz Sarajeva, te „**Udruženje mladih**“ iz Bužima.

Podrška realizaciji lokalnih građanskih inicijativa realizovana je u okviru projekta „UMiD online“, koji provodi Institut za razvoj mladih KULT, pa će priliku da se upoznaju sa konceptom obuke, te steknu nova znanja i vještine dobiti i stanovnici ovih dvanaest lokalnih zajednica u BiH.

Kako su istakli predstavnici udruženja sa kojima su potpisani ugovori, ovakav vid podrške znači im mnogo jer će im dodijeljena sredstva značajno pomoći u poboljšanju uslova u lokalnoj zajednici.

Sve aktivnosti koje su predviđene u okviru inicijativa bit će realizovane do oktobra 2016. godine. ■



Osam dana učenja, druženja i zabave!

U Obrazovno-raznodnom centru za mlade Spjalica na Ilidži od 21. do 28. jula 2016. godine održana je Ljetna škola UMiD 10.

Ljetnu školu UMiD za desetu generaciju otvorile su kantonalna službenica za mlade *Lejla Lihovac* i predstavnica mladih Općine Ilidža *Ena Tuzlak*.

Tokom osam dana, koliko je trajala Ljetna škola, mladi su učili o pokretanju lokalnih građanskih inicijativa, pisanju i provođenju projekata, korištenju društvenih mreža u online aktivizmu, ljudskim pravima, mirnom rješavanju konflikata, družili se, te upoznali sa primjerima dobre prakse. Učesnicima Ljetne škole predstavljen je i koncept obuke „UMiD online“. Predavači na radionicama bili su profesionalci iz različitih oblasti sa dugogodišnjim iskustvom.

U okviru Ljetne škole organizovana su i tri programa „Kafa sa...“.

Omladinski radnik *Dino Sinanović* sa mladima je u okviru programa „Kafa sa...“ razgovarao o lokalnim građanskim inicijativama, te ih naučio kako ideju pretvoriti u konkretnu aktivnost.

U okviru istog programa polaznici obuke od *Eldara Komara*, aktiviste Inicijative mladih za ljudska prava, naučili su više o ljudskim pravima, te se družili i razmijenili iskustva sa volonterima Evropske volonterske službe“.

U Ljetnoj školi UMiD 10 učestvovali su mladi iz cijele Bosne i Hercegovine u dobi od 18 do 30 godina. ■



**SVITAC**

OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

Email: svitac@gmail.netWeb: www.svitac.orgFB: www.facebook.com/omladinska.svitac

Dnevne radionice

Omladinska organizacija Svitac je u julu nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupa sa mališanima je ovog mjeseca pravila razne dekoracije od kolaž i origami papira, kao što su gusjenice i ostale zanimljive životinje, zatim su radili na tehnikama crtanja vodenim bojama, koristeći masne i drvene bojice. Šejkeri od malih plastičnih flaša su takođe ovog mjeseca bili na programu za kreativni dio aktivnosti. Jutarnja mala grupa je svakog četvrtka učila i ponavljala brojeve od 1-15 koristeći radne listove za bojenje, a ponavljali su i oblike i boje na engleskom jeziku. Grupa je takođe vrijedno vježbala tekst i melodije raznih pjesmica na engleskom jeziku prilagođene njihovom uzrastu. Cilj ovih aktivnosti je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugima i usvoje lijepo ponašanje. U julu je između 20-30 učesnika svaki dan pohađalo jutarnje kreativne radionice.





Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).

Ponedjeljkom je na rasporedu engleski jezik, komunikacija, izgovor, te razne igre koje pospješuju učenje stranog jezika u grupi. Grupa je takođe i ovaj mjesec, pored gramatičkih zadataka, vježbala komunikaciju na engleskom jeziku.


Utorkom - kreativno izražavanje, pravljenje raznih dekoracija.

Srijeda je dan za učenje osnova njemačkog jezika kao i za pomaganje u izradi domaće zadaće.

Svakog četvrtka velika grupa je podijeljena u dvije manje i učesnici imaju mogućnost da

izaberu sport ili ples, a petkom muzičke radionice gdje muzički koordinator *Sanjin Vošanović*, zajedno sa međunarodnom volonterkom *Monicom Reeves*, radi na motorici i ritmičkim vježbama uz pomoć boom whacersa.

Radionice se održavaju u Omladinskom centru Brčko distrikta. Koordinator radionica u julu je bila *Slađana Bašić* uz asistenciju lokalnih i Weltwaerts i EVS međunarodnih volontera *Jonasa Kiesnera* i *Anne Bonitz* iz Njemačke, *Vanesse Brumen* iz Austrije, *Marike Olsen* iz SAD-a, te *Monice Reeves*, *Eleonore Peterson*, *Christiana Mennella* i *Trang Pham* iz Velike Britanije. Broj učesnika starije grupe je trenutno između 20 i 25 učesnika.



Jezičke radionice

„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-20:00 časova. Zbog velike zainteresovanosti i različitih nivoa poznavanja jezika i gramatike, učesnici su podijeljeni u dvije grupe, u grupu za početnike (novi A1) i napredne (A2, B1, B2). Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. U julu su grupe na svim levelima radili na tekstovima prilagođenim njihovom poznavanju njemačkog jezika iz njemačkog magazina za mlade „Vitamin.De“. Grupe A2, B1 i B2 su igrali igru „Tabu“ u kojoj se različiti pojmovi moraju što bolje objasniti na njemačkom jeziku.

Koordinatori projekta su međunarodna volonterka iz Njemačke *Anne Bonitz* i *Vanessa Brumen* iz Austrije. Radionice je u julu pohađalo 20 učesnika (obje grupe).

„I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. U julu su učesnici radionica radili na komunikaciji i debatama sa različitim temama.

Koordinator projekta je međunarodna volonterka iz Velike Britanije *Monica Reeves*. Radionice u julu je pohađalo 15 učesnika.

„Parliamo italiano insieme“ – radionice komunikacije na italijanskom jeziku za početnike

Radionice italijanskog jezika se održavaju svakog utorka u prostorijama Omladinskog centra Brčko distrikt od 18:00-19:30 časova. Radionice komunikacije na italijanskom jeziku su namijenjene za uzrast 16+ za sve koji žele naučiti osnove italijanskog jezika i upotrebu svakodnevnice komunikacije u dijalozima, te steći nova iskustva i poznanstva. U julu je grupa radila na vježbanju usmene komunikacije u svakodnevnici i konjugaciji glagola kroz lične zamjenice, te su se upoznavali sa određenim i neodređenim članovima uz imenice, prisvojnim zamjenicama i bogaćenju vokabulara.

Koordinator projekta je međunarodna volonterka iz Austrije *Vanessa Brumen*. Radionice je u julu pohađalo 10 učesnika. ■

Radionice komunikacije na francuskom jeziku za početnike

Radionice francuskog jezika se održavaju svake srijede u prostorijama Omladinskog centra Brčko distrikt od 20:00-21:30 časova. Radionice na francuskom jeziku su namijenjene za uzrast 16+ za sve koji žele naučiti osnove francuskog jezika te steći nova iskustva i poznanstva. Koordinator projekta je u julu bila međunarodna volonterka iz Njemačke *Anne Bonitz*. Radionice je pohađalo 10 učesnika. ■

Dramske radionice

Projekat „Dramske radionice“ za mlade se održava svakog utorka u prostorijama Omladinskog centra Brčko distrikt od 19:30-21:00 časova. Grupa trenutno radi na petoj sceni komedije „**Ne mora uvijek biti Šekspir**“. Svaka radionica počinje sa vježbama zagrijavanja u trajanju od 10 do 20 minuta, a koje su od velike pomoći za opuštanje prije aktuelne realizacije radionice. U toku jula dramska grupa je imala više sastanaka, kako bi diskutovali o individualnom radu na scenama i tekstu. Ovaj mjesec su intenzivno radili na pojedinim scenama i na pripremama za eventualni nastup. Cilj ovog projekta je da mladi ljudi, koji vole pozorište i glumu usvoje nove vještine, te da steknu nova iskustva i poznanstva.

Koordinator projekta je *Anne Bonitz*, međunarodna volonterka iz Njemačke. Dramske radionice u julu je pohađalo 15 učesnika, uzrasta 16+. ■

„Freeletics“ – sportske radionice

Sportske radionice „Freeletics“ se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt. Radionice su namijenjene za mlade ljude koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Ovaj mjesec koordinator je posebnu pažnju obratio na kondicione vježbe. Tokom zagrijavanja takođe su se koristile vježbe joge za usvajanje bolje tehnike disanja i pravilnog istezanja mišića.

Koordinator projekta je *Miloš Popić*. Asistent na sportskim radionicama je *Jonas Kiesner*, međunarodni volonter iz Njemačke. Radionice je u julu pohađalo 7 učesnika. ■

Muzičke radionice

Music from around the world – muzičke radionice pjevanja

Novi muzički projekat je počeo sa realizacijom početkom juna. Cilj ovih radionica je okupiti što više mladih ljudi (16+) koji se interesuju za muziku širom svijeta i koji vole pjevati ali i učenje osnova muzike uz korištenje boomwhackersa (muzičkih cijevi), timski rad, razvijanje samopouzdanja kao i upoznavanje učesnika sa različitim muzičkim žanrovima. Na radionici učestvuju i drugi međunarodni volonteri. Pred kraj mjeseca učesnici su počeli uvježbavati „**In the hall of the mountain king**“ norveškog kompozitora *Edwarda Griega*.



Radionice se održavaju svakog petka u prostorijama Omladinskog centra od 14:00 do 15:30 časova. Koordinator radionica su *Sanjin Vošanović* i međunarodna volonterka iz Velike Britanije *Monica Reeves*. Broj učesnika je 8-10. ■

Radionice gitare

Učesnici radionice gitare u julu su nastavili sa redovnim radom uvježbavajući razne tehnike, etide i kompozicije u skladu sa njihovim trenutnim poznavanjem instrumenta. ■

Radionice sambe

Učesnici ove radionice u julu su dalje razvijali varijacije na zadatu temu iz prethodnog perioda. ■



Posjeta NEFF-u - Nürnberg, Njemačka

Predsjedavajuća upravnog odbora organizacije NEFF, *Hertha Steinmaier*, je pozvala predstavnike organizacije *Svitac*, *Edinu* i *Sanjina Vošanović*, da posjete NEFF u Nürnbergu, kako bi u periodu između 20.06. i 28.06. učestvovali na sastancima sa predstavnicima NEFF-a. Cilj posjete je bio predstaviti rad organizacije *Svitac* u Brčkom, te razgovarati o svakodnevnim poteškoćama i izazovima u radu sa djecom i mladima.

Prezentacija rada Omladinske organizacije *Svitac* je održana 23.06.2016. u prostorijama Zionsgemeinde u Nürnbergu. Gospođa *Elisabeth Fischer*, jedna od predstavnika Zionsgemeinde, je moderirala prezentaciju i na taj način pružila *Edini* i *Sanjinu* šansu da predstavite rad organizacije. Gosti su imali priliku pogledati dva video zapisa sa ljetnih kampova i takođe pogledati fotografije sa raznih dnevnih i godišnjih aktivnosti.

Ostale dane u Nürnbergu *Edina* i *Sanjin* su proveli na sastancima sa članovima NEFF-a, prisustvovali su prezentaciji knjige „*Fremder Feind, so nah*“ njemačke spisateljice *Alexandre Senfft*, koja je od početka prve intifade do 1991. godine radila u Palestini kao glasnogovornica UNRWA, te razgovarali sa njom o trenutnoj situaciji u Bosni, Izraelu i Palestini. *Edina* i *Sanjin* su takođe dali intervju za novine „*Nürnberger Nachrichten*“, pričajući o radu sa mladima na području Brčko distrikta.

Za avgust se planira nastavak svih redovnih radionica Omladinske organizacije *Svitac*. ■





Anesa Hidić, član Omladinske mreže, pojedinac

Omladinski krug Kladanj
E-mail: anesahidic@hotmail.com

Kladanj i Vlasenica biciklima će prenijeti poruke mira i tolerancije

Biciklistički klub KPL u okviru projekta „Šetajmo, vozimo stazama mira ka boljoj budućnosti“ organizirao je „Biciklijadu mira“ u Vlasenici.

Biciklijadi su prisustvovali biciklisti i biciklistkinje iz Kladnja, Tuzle, Živinica, Bijeljine, Brčkog, Rogatice, Istočnog Sarajeva i Sjedinjenih Američkih Država.



Ovaj projekat korak je ka povezivanju dviju općina - Kladanj i Vlasenica, koje imaju veoma malu komunikaciju i zajedničku saradnju, ispričao je Amer Šehić iz Kladnja član biciklističkog kluba zahvaljujući kojem je postao i dio ovog projekta. ■

Održane radionice "Svijet tišine- učenje znakovnog jezika"



Dana 25.07.2016. godine upostorijama udruženja "Dječija radost" održane su radionice "Svijet tišine - učenje znakovnog jezika" u okviru projekta "Sretni dani" kojeg realizuje neformalna grupa obrazovanih i aktivnih mladih u Kladnju, finansiran od strane Fondacije Mozaik i Općine Kladanj. ■

Adem Kolak II na državnom takmičenju

Adem Kolak, jedan od članova „Biciklističkog kluba“ Kladanj, osvojio je II mjesto na državnom takmičenju.



Zlatiborska čarolija: Poklon Francuske narodne pomoći djeci iz Kladnja i Požege

Grupa djece iz Požege i Kladnja boravila je, u sklopu tradicionalnog godišnjeg okupljanja, a u organizaciji **Francuske narodne pomoći** (Secours populaire de France), na Zlatiboru od 20. do 22. jula. Trodnevno druženje bilo je ispunjeno brojnim zajedničkim aktivnostima djece iz dvije susjedne države, od kreativne likovne radionice na kojoj je, pored pojedinačnih radova, nastala i zajednička slika, izletima u Sirogojno, Gostilje, Stopića pećinu, a našlo se vremena i za kupanje na bazenima u centru Zlatibora i Gostilju.



Olimpijada fizičara: Bahrudin Trbalić iz Kladnja osvojio drugo mjesto!



Na 47. Međunarodnoj olimpijadi iz fizike održanoj od 10. do 17. jula u Cirihi, učenik Međunarodne srednje škole u Tuzli, kladnjak *Bahrudin Trbalić*, osvojio je srebrnu medalju. ■

Održan prijem za učenike generacija i učenike sa posebnim diplomama

Općinski načelnik i predsjedavajući Općinskog vijeća danas su u zgradi Općine Kladanj upriličili prijem za učenike generacije i učenike sa posebnim diplomama Osnovnih škola Kladanj i Stupari i Srednje škole „Musa Ćazim Ćatić“.

Učenik generacije Srednje škole „Musa Ćazim Ćatić“ je *Tarik Gurda*, Osnovne škole Kladanj, *Adna Softić*, a Osnovne škole Stupari, *Ajla Hadžikić*. ■





H.O. Muslimansko dobrotvorno društvo MERHAMED Doboje

Ul. Kralja Aleksandra 17, 74000 Doboje
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboje

- Priređen je Merhametov iftar "Kod Sabrije u Meraku" sa 47. džematlija na kojem su bili veoma zadovoljni. Posebna ističemo doprinos inicijatora i donatora ovih druženja.



- U subotu 02.07.2016. godine izvršena je raspodjela Humanitarne pomoći - „Ramazanskih paketa“.



- Načelnica općine Doboj - jug organizovala je iftar za džematlije u džamiji Trnjak.



- Aktivnostima u organizaciji TACSO, na kojima je prisustvovala i *Avdić Faketa* bile su teme:
 - Ruralni i lokalni razvoj i zapošljavanje;
 - Socijalna uključenost i zapošljavanje;
 - Obrazovanje odraslih i zapošljavanje.



- Volonterka „Merhameta“ *Semra Jašarević* učestvovala je na Institutu za razvoj mladih Kult na obuci Omladinskih lidera/ki – „Uči, misli i djeluj!“ u Obrazovno rasonodnom centru za mlade „Spajalica“ na Ilidži u toku ljetne škole UMID. Program i teme ljetne škole su bile: Projekt – šta ga čini uspješnim; Pojam ljudskih prava; Društvene mreže; Predrasude i diskriminacija; Izbjeglice; Konflikt – rješavanje sukoba; Medijacija.



Omladinski klub "DIJAMANT"

Ul. Bučići 42, 70101 Jajce

Tel./fax: +387 30 279 444, +387 61 179 209, +387 63 366 811

E-mail: m.sekib@bih.net.ba

WEB: www.ocd-dijamant.net



USPJEŠNO ODRŽANA XII TRADICIONALNA KULTURNO-SPORTSKA I ZABAVNA MANIFESTACIJA "DANI NAŠEGPOVRATKA 1992-2016."

U okviru manifestacije »Dani našeg povratka« Omladinski klub „DIJAMANT“ Jajce, sa svojim članovima/icama folklorne i plesna grupe Dijamantice, u večernjim satima u Bučićima kod Jajca, održao je XIII po redu tradicionalnu manifestaciju „**Dani našeg povratka**“ uz bogat kulturno-sportski i zabavno-humoristički program pred više stotina posjetilaca. Poseban pečat su dali članovi folklornog društva BZK „Preporod“ Jajce, te folklorna i plesna grupa „Dijamantice“ izvođenjem svojih koreografija.



Prisutni građani su izrazili zadovoljstvo programom manifestacije i obilježavanje godišnjice povratka, jer im je ovo vrlo važan dan u njihovom životu, jer se kroz ovaj datum prisjete lošeg razdoblja kada su morali napusti svoje ognjište, a također i lijepog trenutka kada su imali priliku da se vrate na svoja ognjišta.

Pored igre i zabave, prisutni su imali priliku da se uključe i takmiče u više disciplina, kao što su: igranje narodnih kola, skakanja u vreći, jedenje jabuke bez ruku i jedenje torte bez ruku. Takmičenje u malom fudbalu za dječake do 14. godina, te Kviz znanja o kulturnom sjećanju. Pobjednici po disciplinama su novčano nagrađeni.

Svi prisutni su i ovog puta bili oduševljeni organizacijom i priređenom programu, a posebnu pažnju su privukle ljepotice folklorne i plesne grupe „Dijamantice“ kao i članovi B.Z.K. „Preporod“ Jajce, svojim uigranim vještinama u



izvođenju koreografije, a na kraju su i nagrađene gromoglasnim aplauzom što je satisfakcija dosadašnjem uspješnom radu organizatora.

Treba napomenuti da su građani, volonteri i aktivisti dali svoj doprinos organizaciji kao i gđin. *Edin Hozan* načelnik Općine Jajce. ■

SAOPŠTENJA/INFORMACIJE/ DONATORI/POZIVI

Objavljen Vodič kroz evropske fondove za neprofitni sektor za 2016. godinu

Više od 20 godina, **Evropski servis za građansku akciju (ECAS)** objavljuje Vodič kroz evropske fondove za neprofitni sektor na godišnjem nivou, kao dio usluga o mogućnostima finansiranja koji ECAS pruža za svoju mrežu članova. Vodič se dodatno prodaje i onima koji nisu članovi, a zainteresovani su za oblast EU finansiranja.

Izdanje vodiča za 2016. godinu se nudi u dva formata (elektronsko i štampano) kako bi se zadovoljile različite potrebe čitatelja. Besplatni ekstrakt Vodiča možete pronaći klikom ovdje.

Vodič kroz evropske fondove pruža odličnu polaznu tačku za organizacije i pojedince zainteresovane da se prijave za sredstva EU, jer nudi:

- Uvod u sveobuhvatni okvir EU programa finansiranja ;
- Uvid u prioritete Evropske komisije i glavne budžetske linije od značaja za neprofitni sektor za 2016. godinu;
- Detaljne informacije o glavnim EU programima finansiranja, uključujući i praktične savjete i ključne kontakt osobe;
- Korisne savjete i preporuke za pripremu projektnih aplikacija.

Evropski servis za građansku akciju (ECAS) je međunarodna neprofitna organizacija sa sjedištem u Bruxelles-u sa pan-evropskim članstvom i 24 godina iskustva.

Više informacija na: <http://euinfo.ba/objavljen-vodic-kroz-evropske-fondove-za-neprofitni-sektor-za-2016-godinu/>

Raspisan javni poziv za sufinansiranje projekata iz oblasti sportske rekreacije

Sufinansiranje projekata se odnosi za projekte, koji će omogućiti učešće svim kategorijama stanovništva (djeca, mladi i odrasli) grada Banjaluke u cilju podsticanja bavljenja sportskom rekreacijom a koji su usmjereni ka sljedećem:

- programi namijenjeni za rekreativno vježbanje, koji se odnose na sve uzrasne kategorije stanovništva;
- programi koji se odnose na promotivne i masovne akcije – u cilju promocije rekreacije;
- programi za poboljšanje opšteg zdravstvenog stanja (opuštanja i relaksacija, antizamor programi, antistres programi, kardio programi i sl.) i ostali programi.

Na javni poziv, mogu se prijaviti pravna lica (sportske organizacije, savezi, ustanove), koja su registrovana i djeluju na teritoriji grada Banje Luke, za obavljanje djelatnosti iz domena sporta/sportske rekreacije. Najviši iznos koji će biti dodijeljen po jednom projektu je 2.000 KM.

Prijave na javni poziv, sa potrebnom dokumentacijom, zainteresovani mogu dostaviti u jednom primjerku u zatvorenoj koverti, u kancelariju broj 14 Gradske uprave ili putem pošte na adresu: Grad Banja Luka, Gradska uprava, Odjeljenje za društvene djelatnosti, Trg srpskih vladara 1, 78000 Banja Luka, sa naznakom: Javni poziv za predlaganje projekata iz oblasti sportske rekreacije, koji će se sufinansirati iz Budžeta Grada Banja Luka u 2016. godini, poziv na broj 10-66-586/16.

Javni poziv je otvoren do 9. avgusta ove godine.

Kompletan javni poziv i potrebni obrasci objavljeni su na zvaničnoj internet stranici Grada Banja Luka www.banjalukars.ba Više informacija na: <http://www.unoradiobl.com/sr/novost/12542/Raspisan-javni-poziv-za-sufinansiranje-projekata-iz-oblasti-sportske-rekreacije#.V5XQPtnbVIU>

Poziv za dostavljanje prijedloga projekata za finansiranje iz grantova EU

Međunarodna organizacija rada (ILO) u okviru projekta koji finansira EU “Podrška lokalnim partnerstvima za zapošljavanje u Bosni i Hercegovini”, objavljuje **Poziv za dostavljanje konceptnih prijedloga za učešće u konkursu za dodjelu bespovratnih sredstava**.

Poziv je otvoren do 30. augusta 2016. godine za sve općine i gradove u Bosni i Hercegovini (BiH), koji se mogu prijaviti u partnerstvu sa zavodima za zapošljavanje, akreditiranim obrazovnim institucijama, preduzećima, udruženjima građana uključujući lokalne i regionalne razvojne agencije, sindikatima, privrednim komorama itd.

Cilj poziva je da utvrdi interes za učešće u natječaju za dodjelu grantova u vrijednosti između 150,000 i 200,000 eura, koji će biti dodjeljivani u periodu od 2016. do 2018. godine.

Prijedlozi projekata trebaju biti fokusirani na stvaranje novih radnih mjesta i podršku lokalnom razvoju kroz institucionalizaciju saradnje među ključnim lokalnim interesnim stranama.

Ukupna vrijednost projekta je 4 miliona eura, od kojih su 3 miliona eura namijenjena za dodjelu bespovratnih sredstava lokalnim zajednicama u BiH.

Projekat je dio šire podrške EU lokalnom razvoju i zapošljavanju u BiH. Projekt provodi ILO sa ciljem da podrži samoodržive, partnerski vođene aktivnosti u okvirima tržišta rada na lokalnom nivou, kako bi se povećao pristup formalnom zapošljavanju, posebno u područjima pogođenim poplavama u 2014. godini.

Za više informacija, kontaktirajte ILO putem e-mail adrese lep@ilo.org

III poziv za dostavljanje projektnih prijedloga na MAB program

Fondacija Schüler Helfen Leben Sarajevo, otvorila je III poziv za dostavljanje projektnih prijedloga na program Movements Across Borders „MAB“ za 2016. godinu, koji je fokusiran na osnaživanje, povezivanje i zajednički angažman omladinskih organizacija iz Bosne i Hercegovine i Srbije.

Informacije o programu Movements Across Borders (MAB)

„MAB“ ima za cilj ojačati suradnju i međusobno povjerenje između mladih iz Bosne i Hercegovine i Srbije kroz pripremu i realizaciju zajedničkih aktivnosti iz oblasti omladinskog angažmana, koje sadrže komponentu grassroots-a. Ciljna skupina Programa su mladi u starosnoj dobi od 14 do 28 godina, koji su aktivni u omladinskim organizacijama.

Generalni ciljevi Programa su:

- Uspostavljanje, ili daljnji razvoj zajedničkog socijalnog (društvenog) angažmana između mladih iz BiH i Srbije starosne dobi od 14 do 28 godina;
- Promoviranje aktivizma mladih kroz zajedničke grassroots aktivnosti koje doprinose solidarnosti, multikulturalnosti, multietničnosti i toleranciji mladih;
- Uspostavljanje društvene kohezije i kulturne razmjene mladih koja omogućava mladim osobama da pokažu svoju kreativnost i inovativnost;
- Kreiranje prostora za mlade u kojem će moći realizirati svoje aktivnosti;
- Aktivizam i volonterizam mladih;
- Razvoj lokalne zajednice kroz grassroots pristup.

Kakve projektne ideje podržava Fondacija SHL kroz program MAB?

Fondacija SHL će podržati projektne ideje mladih koji sadrže sljedeće tačke:

- Projektne aktivnosti, usklađene s ciljevima “MAB” programa;

- Projektni prijedlog zajednički su kreirali mladi iz BiH i Srbije;
- Projektni prijedlog sadrži grassroots aktivnosti;
- Projektne aktivnosti se realiziraju u dvije faze, jedna faza se održava u BiH, a druga faza projekta u Srbiji;
- Organizacije/aplikanti će koristiti model "lokalni domaćin" (grupa iz BiH prilikom realizacije aktivnosti odsjeda u kućama svojih vršnjaka u Srbiji, i obrnuto);
- Sve aktivnosti u sklopu projekta se realiziraju na volonterskoj osnovi;
- Koordinator/ice projekta su u starosnoj dobi od 14 do 28 godina;
- Realizacija projekta maksimalno traje 8 mjeseci;
- Budžet projektnog prijedloga ne može prelaziti iznos veći od 5000 KM;
- Projektni prijedlog dostavljen u oficijelnoj prijavnjnoj formi programa MAB.

Ko može prijaviti projektni prijedlog

Program MAB je kreiran za omladinske organizacije iz Bosne i Hercegovine i Srbije i neformalne grupe (koje mogu prijaviti svoje projektne prijedloge preko registriranih udruženja građana), koje apliciraju u partnerstvu. Ako nemate partnersku organizaciju možete popuniti informativni obrazac koji možete preuzeti na ovom linku, a Fondacija SHL će nastojati da pronađe vašeg potencijalnog partnera s kojim možete aplicirati na MAB program.

Način prijave

Prijavnicu za MAB program možete preuzeti ovdje, te istu dostaviti putem e-maila: mab@shl.ba.

III Poziv za dostavljanje projektnih prijedloga na MAB program otvoren je **do 18. augusta 2016. godine**. Svi aplikanti će biti informirani o statusu svoje prijave.

Više informacija: <http://shl.ba/index.php/lat/novosti/item/187-iii-poziv-za-dostavljanje-projektnih-prijedloga-na-mab-program>

Ekumenska inicijativa žena: Poziv za projekte

Ekumenska inicijativa žena objavljuje novi javni poziv za predaju projektnih prijedloga iz područja:

- mira i pomirenja
- ekumenskog i međureligijskog dijaloga
- ženskih ljudskih prava

Jednako tako mogu sudjelovati i projektni prijedlozi koji uključuju prekograničnu suradnju unutar geografskoga područja djelovanja EIŽ-a.

Prijaviti se mogu:

- organizacije civilnoga društva i grupe djevojaka koje djeluju u Hrvatskoj, Bosni i Hercegovini, Crnoj Gori, na Kosovu, u Makedoniji ili Srbiji, a čiji godišnji proračun ne prelazi HRK 375.000/ EUR 50.000
- teologinje i studentice teologije koje djeluju u Hrvatskoj, Bosni i Hercegovini, Crnoj Gori, na Kosovu, u Makedoniji ili Srbiji

Iznos ukupnih sredstava koja će se dodijeliti: do HRK 792.750 / EUR 105.000

Visina pojedinačne potpore: do HRK 30.000/EUR 4.000 ili HRK 52.500/EUR 7.000

Rok za prijavu: **15. 9. 2016. do 15 sati**.

Detaljnije informacije, kao i natječajnu dokumentaciju, možete pronaći na linku <http://www.eiz.hr/call-for-proposal/applicants/application-procedure/?lang=hr>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba

Mjesečni bilten uređuje
Omladinski resursni centar - ORC Tuzla

WEB stranica Mreže:
www.omladina-bih.net

Mejling lista Mreže:
posta@omladina-bih.net

Webmaster:
emir.delalic@gmail.com